


朱子書節要

七




館書圖京東			
二	九	四	儒
冊	號	架	家
			漢
			書
			門
			類


漢書門			
二	九	四	冊
冊	號	架	類


內閣文庫			
二	九	四	漢
冊	號	架	書

內閣文庫	
番號	漢 6018
冊數	20 (7)
函號	298 279

不許帶出







朱子書節要卷之七諸子目錄

問答

淺草文庫

袁機仲

一卷作
袁寺丞

趙提舉

名善譽胡一桂啓蒙翼傳云公有
易說二卷嘗為寺丞將清湖陰

周益公

二卷作
周丞相

留丞相

見二卷

曾裘父

名季狸號艇齋瀛奎律髓紅梅詩註云
先生嘗稱其廩廩乎有前輩之遺風

耿直之

名秉語類云嘗為浙
漕及鎮江有善政

薛士龍

名季宜未嘉入師李溉嘗從伊川學公
博覽精思官知湖州所著有經書訓義浪

集語

林謙之

名光朝號艾軒莆田人專心踐履登第為
廣東提刑屢破茶寇孝宗喜召為祭酒中

朱子書節要七目錄

書舍人十一統志以伊洛之學倡東南江元適各冰續集

詹體仁名儀之嚴州遂安人南軒守嚴東萊分卷詹帥下

楊廷秀

名萬里吉水人第進士調零陵丞時張紫巖謫居勉以正心誠意之學以誠名齋以寶文閣待制致仕際遇三朝始終一節開禧邊急幽憤不食卒謚文節

李季章

見二卷

范文叔

名仲黼成都人嘗任國子博士蜀人高其行東從南軒東萊游入偽籍先生銘其母王氏墓一統志公嘗與魏了翁李心傳虞剛簡輩講學蜀東門外得程朱微旨云

陳君舉

名傳良號止齋永嘉人第進士官至寶謨閣待制謚文節與張南軒曰東萊為友文

擅當

劉德脩

名光祖號後溪簡州陽安人第進士光宗初為侍御史乞禁道學之議讀者流涕入

黃文叔

名度紹興人第進士官禮部尚書謝病歸佐胃為所覺斥去然佐胃素憚公不敢加害

徐元敏

林正夫

名湜福州長溪人登進士官至龍圖閣有繫隱類集嘗以監察御史疏言幸執皆小

戴邁

林巒

實紀泉州人

呂侏

楊宋卿

柯國林

名翰同安人先生在同安舉翰差學職狀進士柯翰守道恬退不隨流俗專以講究

經旨

許順之

名升號存齋同安人從學於朱子子稱其天性恬澹無物欲之累後果深得道學之

蘊為時名儒右一統志云云又實純云朱子為作字序齋記稱其學專用心於內然公實涵禪終不

陳齊仲

實純同安人朱子答書有曰詩解用意甚深

王近思

實純名力行泉州同安人嘗著朱氏傳授支派圖及錄辛亥問答

魏元履

見一卷

魏應仲

范伯崇

名念德伯達子朝奉節江東帥機先生嘗稱其學大進臨沒屬以修正禮書又嘗為

戶陵屬邑主簿先生記其廳。劉白水女壻於先生為姪

朱子書節要卷之七

問答

答袁機仲

樞以清名直節受知阜陵位至侍
郎憤世疾邪不安于朝退居梅巖

以上五條鄙意傾倒無復餘蘊矣然此非熹之說乃
康節之說非康節之說乃希夷之說非希夷之說乃
孔子之說但當日諸儒既失其傳而方外之流陰相
付受以為丹竈之術至於希夷康節乃反之於易而
後其說始得復明於世然與見今周易次第行列多
不同者故聞者創見多不能曉而不之信只據目今
見行周易緣文生義穿鑿破碎有不勝其杜撰者此

啓蒙書下
有無字

啓蒙之書所為作也若其習聞易曉人人皆能領略
則又何必更著此書以為屋下之屋牀上之牀哉更
願高明毋以為熹之說而忽之姑且虚心遜志以求
其通曉未可好高立異而輕索其瑕疵也玩之久熟
浹洽於心則天地變化之神陰陽消長之妙自將瞭
於心目之間而其可驚可喜可笑可樂必有不
其所以然而然者矣言之不盡偶得小詩以寄鄙懷
日忽然半夜一聲雷萬戶千門次第開若識無心涵
有象許君親見伏羲來說得太郎當了只少箇拄杖
卓一下便是一回普說矣狂妄僭率幸勿鄙謂也上

五條五條所辨河圖洛書先天後天七八九六四
五爻重卦等說散見於啓蒙及易圖說可考而知今
此不錄瞭於心目之間瞭下恐脫然字
若識無心涵有象心啓蒙作中涵作舍

答袁機仲別幅

來喻以東南之溫厚為仁西北之嚴凝為義此鄉飲
酒義之言也然本其言雖分仁義而無陰陽柔剛之
別但於其後復有陽氣發於東方之說則固以仁為
屬乎陽而義之當屬乎陰從可推矣來喻乃不察此
而必欲以仁為柔以義為剛此既失之而又病夫柔
之不可屬乎陽剛之不可屬乎陰也於是彊以溫厚
為柔嚴凝為剛又移北之陰以就南而使主乎仁之

柔移南之陽以就北而使主乎義之剛其於方位氣
候悉反易之而其所以爲說者率皆參差乖迕而不
可合又使東北之爲陽西南之爲陰亦皆得其半而
失其半愚於圖子已具見其失矣蓋嘗論之陽主進
而陰主退陽主息而陰主消進而息者其氣彊退而
消者其氣弱此陰陽之所以爲柔剛也陽剛溫厚居
東南主春夏而以作長爲事陰柔嚴凝居西北主秋
冬而以斂藏爲事作長爲生斂藏爲殺此剛柔之所
以爲仁義也以此觀之則陰陽剛柔仁義之位豈不
曉然而彼揚子雲之所謂於仁也柔於義也剛者乃

自其用處之末流言之蓋亦所謂陽中之陰陰中之
陽固不妨自爲一義但不可以雜乎此而論之爾向
日妙湛蓋嘗面稟易中卦位義理層數甚多自有次
第逐層各是一箇體面不可牽彊合爲一說學者須
是旋次理會理會上層之時未要攪動下層直待理
會得上層都透徹了又却輕輕揭起下層理會將去
當時雖似遲鈍不快人意然積累之久層層都了却
自見得許多條理千差萬別各有歸著豈不快哉若
不問淺深不分前後輒成一塊合成一說則彼此相
妨令人分踈不下徒自紛紛成箇莽矣此是平生讀

書已試之效不但讀易為然也得其半而失其半所謂嚴疑者得於北而

失於東所謂溫厚者得於南而失於西也右先生說妙湛疑是寺各曾與機仲會此論易

答袁機仲

易說已悉若只如此則熹固已深曉不待諄諄之告矣所以致疑正恐高明之見有所未盡而費力穿鑿使陰陽不得據其方盛之地仁義不得保其一德之全徒爾紛紜有損無益爾今既未蒙省察執之愈堅則區區之愚尚復何說竊意兩家之論各自為家公之不能使我為公猶我之不能使公為我也不若自此閉口不談各守其說以俟義文之出而質正焉然以

高明之見自信之篤竊恐義文復出亦未肯信其說也魏鄭公之言以為望獻陵也若昭陵則臣固已見之矣佛者之言曰諸人知處良遂恣知處諸人不知正此之謂矣世間事吾人身在閑處言之無益此正好從容講論以慰窮愁而柄鑿之不合又如此是亦深可歎者而信乎其道之窮矣

答趙提舉善譽

慕用之久往歲雖辱寵臨而倥傯卒迫不能少敘每以為恨近乃竊窺所著易論語書又歎其得之之晚而不獲親扣名理也高明不鄙遠辱貽書感慰無量

不敢無以報也。蓋道體之大無窮而於其間文理密
察有不可以毫釐差者。此聖賢之語道所以既言發
育萬物峻極于天以形容其至大而又必曰禮儀三
百威儀三千以該悉其至微而其指示學者脩德凝
道之功所以既曰致其廣大而又必曰盡其精微也。
近世之言道者則不然其論大抵樂渾全而忌部析
喜高妙而略細微其於所謂廣大者則似之而於精
微有不察則其所謂廣大者亦未易以議其全體之
真也。今且以經言論之其所發明固不外乎一理然
其所指則不能無異同之別而就其所同之中蓋亦

不無賓主親踈遠近之差焉。如卦之所以八者以奇
偶之三加而成也而又之所以三則取諸三才之象
而非奇偶所能與此理之一而所指之不同者也。四
象之說本爲畫卦則當以康節之說爲主而七八九
六東西南北水火金木之類爲客得其生則客之親
踈遠近皆即此而可定不得其生而曰是皆一說則
我欲同而彼自異終有不可得而同者矣。此所指之
同而不能無賓主之分者也是皆樂渾全而忌剖析
之過也。至於乾坤之純而不雜者聖人所以形容天
地之德而爲六十四卦之綱也。乾之純於剛健而不

雜又聖人所以形容天理自然之全體而為坤之綱也所以贊其剛健柔順之全德以明聖人體道之妙學者入德之方者亦云備矣未嘗以其偏而少貶之也至於諸爻雖或不免於有戒然乾九三之危以其失中也其得無咎以其健而健也坤六五之元吉以其居尊而能下也上六之龍戰以其大盛而亢陽也是豈惡乾之剛而欲其柔惡坤之柔而欲其剛哉今未察乎其精微之蘊而遽指其偏以為當戒意若有所未足於乾坤而陋小之者是不亦喜高妙而略細微之過乎至於用九用六乃為戒其剛柔之偏者然

亦因其陰變為陽陽變為陰之象而有此戒如歐陽子之云者非聖人創意立說而強為之也大抵易之書本為卜筮而作故其詞必根於象數而非聖人已意之所為其所勸戒亦以施諸筮得此卦此爻之人而非反以戒夫卦爻者近世言易者殊不知此所以其說雖有義理而無情意雖大儒先生有所不免比因玩索偶幸及此私竊自慶以為天啓其衷而以語人人亦未見有深曉者不知高明以為如何舊亦草筆其說今謾錄二卦上呈其他文義未瑩者多未能卒業姑以俟後世之子雲耳近又嘗編一小書略論

衷

象數梗概并以為獻妄竊自謂學易而有意於象數
之說者於此不可不知外此則不必知也心之精微
言不能盡臨風引領馳想增劇為坤之綱也下疑有
闕文一小書啓蒙

答周益公必大

前者累蒙誨諭范碑曲折考據精博論議正平而指
意深遠尤非常情所及然隱之於心竊有所不能無
疑者蓋嘗竊謂呂公之心固非晚生所能窺度然當
其用事之時舉措之不合衆心者蓋亦多矣而又惡
忠賢之異已必力排之使不能容於朝廷而後已
則一世之正人端士莫不惡之況范歐二公或以諷

議為官或以諫諍為職又安可置之而不論且論之
而合於天下之公議則又豈可謂之太過也哉逮其
晚節知天下之公議不可以終拂亦以老病將歸而
不復有所畏忌又慮夫天下之事或終至於危亂不
可如何而彼衆賢之排去者或將起而復用則其罪
必歸於我而并及於吾之子孫是以寧捨故怨以為
收之桑榆之計蓋其慮慮之意雖未必盡出於至公
而其補過之善天下實被其賜則與世之遂非長惡
力戰天下之公議以貽患於國家者相去遠矣至若
范公之心則其正大光明固無宿怨而惓惓之義實

在國家故承其善意既起而樂爲之用其自訟之書
所謂相公有汾陽之心之德仲淹無臨淮之才之力
者亦不可不謂之傾倒而無餘矣此最爲范公之感
德而他人之難者歐陽公亦識其意而特書之蓋呂
公前日之貶范公自爲可罪而今日之起范公自爲
可書二者各記其實而美惡初不相掩則又可見歐
公之心亦非淺之爲丈夫矣夫呂公之度量心術期
以濟務則誠然矣然有度量則宜有以容議論之異
同有心術則宜有以辨人才之邪正欲成天下之務
則必從善去惡進賢退姦然後可以有濟今皆反之

而使天下之勢日入於昏亂下而至於區區西事一
方之病非再起范公幾有不能定者則其前日之所
爲又惡在其有度量心術而能成務也哉其用人也
欲才德之兼取則亦信然矣然范歐諸賢非徒有德
而短於才者其於用人蓋亦兼收而並取雖以孫元
規滕子京之流恃才自肆不入規矩亦皆將護容養
以盡其能而未嘗有所廢棄則固非專用德而遺才
矣而呂公所用如張李二宋姑論其才亦決非能優
於二公者乃獨去此而取彼至於一時豪俊踴馳之
士窮而在下者不爲無人亦未聞其有以羅致而器

使之也且其初解相印而薦王隨陳堯佐以自代則
未知其所取者為才也耶為德也耶是亦不足以自
解矣若謂范歐不足以知呂公之心又不料其子之
賢而攻之大過則其所攻事皆有迹顯不可掩安得
為過且為侍從諫諍之官為國論事乃視宰相子弟
之賢否以為前却亦豈人臣之誼哉若曰范呂之仇
初未嘗解則范公既以呂公而再逐及其起任西事
而超進職秩乃適在呂公三入之時若范公果有怨
於呂公而不釋乃閔默受此而無一語以自明其前
日之志是乃內懷憤毒不能以理自勝而但以貪得

羨官之故從而受其籠絡為之驅使未知范公之心
其肯為此否也若曰歐公晚悔前言之失又知其諸
子之賢故因范碑以自解則是畏其諸子之賢而欲
陰為自託之計於是寧賣死友以結新交雖至以無
為有愧負幽冥而不違極又不知歐公之心其忍為
此否也況其所書但記解仇之一事而未嘗并譽其
他羨則前日斥逐忠賢之罪亦未免於所謂欲蓋而
彰者又何足以贖前言之過而媚其後人也哉若論
忠宣之賢則雖亦未易輕議然觀其事業規模與文
正之洪毅開豁終有未十分肖似處蓋所謂可與立

而未可與權者乃翁鮮仇之事度其心未必不深恥
之但不敢出之於口耳故潛於墓碑刊去此事有若
避諱然者歐公以此深不平之至屢見於書疏非但
墨莊所記而已況龍川志之於此又以親聞張安道之
言為左驗張實呂黨充足取信無疑也若曰范公果
無此事而直為歐公所誣則為忠宣者正當沫血飲
泣貽書歐公具道其所以然者以負其父之心迹而
俟歐公之命以為進退若終不合則引義告絕而更
以屬人或姑無刻石而待後世之君子以定其論其
亦可也乃不出此而直於成文之中刊去數語不知

此為何等舉措今不信范公出處文一辭之實歐
公丁寧反復之論而但取於忠宣進退無據之所為
以為有無之決則區區於此誠有不能識者若據實
而言之但曰呂公前日未免蔽賢之罪而其後日誠
有補過之功范歐二公之心則其終始本末如青天
白日無纖毫之可議若范公所謂平生無怨惡於一
人者尤足以見其心量之廣大高明可為百世之師
表至於忠宣則所見雖狹然亦不害其為守正則不
費詞說而各正言順無復可疑矣不審尊意以為如
何所與子約書中疑學道三十年為後學之言者則

熹深感焉而尤以爲不可以不辨不審明公何所惡於斯言而疑之也以道爲高遠玄妙而不可學邪則道之得名正以人生日用當然之理猶四海九州百千萬人當行之路爾非若老佛之所謂道者空虛寂滅而無與於人也以道爲迂遠踈闊而不必學邪則道之在天下君臣父子之間起居動息之際皆有定之明法不可頃刻而暫廢故聖賢有作立言垂訓以著明之巨細精粗無所不備而讀其書者必當講明究索以存諸心行諸身而見諸事業然後可以盡人之職而立乎天地之間不但玩其文詞以爲綴緝

纂組之上而已也故子游誦夫子之言曰君子學道則愛人小人學道則易使而夫子是之則學道云者豈近世後學之言哉若謂歐公未嘗學此而不當以此自名耶則歐公之學雖於道體猶有欠闕然其用力於文字之間而沂其波流以求聖賢之意則於易於詩於周禮於春秋皆嘗及復窮究以訂先儒之繆而本論之篇推明性善之說以爲息邪距諛之本其賢於當世之號爲宗工巨儒而不克於祖尚浮虛信惑妖妄者又遠甚其他文說雖或出於遊戲翰墨之餘然亦隨事多所發明而詞氣藹然寬平深厚精切

的當真韓公所謂仁義之人者恐亦未可謂其全不
學道而直以燕許揚劉之等期之也若謂雖嘗學之
而不當自命以取高標揭己之嫌耶則為士而自言
其學道猶為農而自言其服田為賈而自言其通貨
亦非所以為夸若韓公者至乃自謂己之道乃未子
孟軻揚雄所傳之道則其言之不讓益甚矣又不可
為後生之語而疑之耶范仲淹隱度也曰公夷然其
公之度量心術期以濟務其
思人也欲才德之兼取范歐不足
以知曰公之心又
不料其子之賢而攻之太過范曰之仇初未嘗解歐
公晚悔前言之失又知其諸子之賢故因范碑以自
解嘗周書語龍川志蘇子由所著燕張說許蘇題揚
億劉子儀

答留丞相

前此偶因垂問率易呈獻亦以姑備燕申餘暇遮眼
止睡之須不謂乃蒙親賜點閱日有程課以及終篇
而斟酌取予詳審精切又有專門名家所不逮者此
周公執執還贊之心畢公克勤小物之意此所以為
聖賢之盛節而非近世諸公所及也熹雖凡陋然其
用力於此不為不久而歷選平生講磨論說其得此
於人蓋鮮不意臨老乃有遇於明公也更有它書欲
遂傾困倒廩以跪進於几下而私居乏人艱於繕寫
少假歲月當遂此心儻得一一悉蒙印證則亦足以

自信而無憾於方來矣顧所不能無恨者猶以登門
之晚而其質疑請益乃有十年之遲伏想明公於此
亦不能不慨然其間也早獻謂獻詩傳也周公執贄
還贄荀子周公謂伯禽之傳
曰吾所執贄而見者十人還贄而見者三十人云云
以正吾身定天下按主相見禮實執贄來見主人既
見後主人親往還其贄於賓禮也此周公自言有我先
執贄而往見者有彼先執贄來我往還贄而見者
以此二等待天下之士也

與曾裘父

季狸號艇齋見朱瀛
李律隨紅梅詩注

向聞垂意魯論聖門親切指要正在此書想所造日
以深矣恨未得聞一二也敬夫得書否比來講論尤
精密亦嘗相與講所疑否元履遇合非常未知所以

稱塞士友蓋多榮之而熹竊有懼焉想高懷正如此
當有以警策之也

答耿直之

秉語類云嘗為浙
漕及鎮江有善政

熹生長窮僻少日所聞於師友者不過脩身窮理守
正俟命之說雖行之不力有愧夙心亦未嘗敢舍之
而從人也頃歲入浙從士大夫游數月之間凡所聞
者無非枉尺直尋苟容偷合之論心竊駭之而獨於
執事者見其綜理各實直道而行卓然非當世之士
也茲者又承示及所與學官弟子講論之說不唯有
以見賢侯在泮弦歌之盛而潛心太業體用圓融之

妙所以警發昧陋者又爲深切三復欣幸不知所言

答薛士龍 季宣

熹竊伏窮山講服盛名之日久矣去年邂逅林擇之歸自宣城又能道餘論一二皆成已成物之大致區區益願承教於前顧以憂患之餘屏跡田里而執事名問方昭德業方起隱顯異趣私竊揣料未容遽遂鄙懷則亦悵然太息而已茲者林擴之之來遠貽書翰所以教告甚悉感幸之至不容於心然而三復來教則有熹愚不敢當者二焉請陳其說而左右者察之熹自少愚鈍事事不能及人顧嘗側聞先生君子

之餘教粗知有志於學而求之不得其術蓋舍近求遠處下窺高馳心空妙之域者二十餘年比乃因而自悔始復退而求之於句讀文義之間謹之於視聽言動之際而亦未有聞也方將與同志一二友朋并心合力以從事於其間庶幾銖積絲累分寸躋攀以幸其粗知理義之實不爲小人之歸而歲月侵尋齒髮遽如許矣懍然大懼日力之不足思得求助於當世有道之君子以速其進而未得也執事乃不知此而反以講道教人之事期之此熹之所以不敢當者一也至於聖賢出處之義則亦略聞之矣顧以材智

朱子書節要
淺劣自知甚明而又學無所成不堪酬酢故自十數
年來日益摧縮不敢復有當世之念雖昨來奉親之
日急於其旨之奉猶不敢自彊其所不足以犯世患
矧今孤露餘生形神凋喪懶廢無用益甚於前誠不
忍復爲影纒結綬之計以重不孝之罪是以杜門空
山其忍窮寂以遂區區之志而庶幾或寡過焉執事
又不知此而反以行道濟時之事責之此熹所以不
敢當者二也感服至意無以爲謝敢布腹心伏惟加
憐察焉繼此儻未斤絕尚冀有以警誨之使不迷於
入德之途則執事之賜厚矣它非所敢望也湖學之

盛甲於東南而其湮廢亦已久矣蓋自熙寧設置教
官之後學者不復得自擇師是以學校之政名存實
亡而人才之出不復如當日之盛今得賢太守身爲
之師其必將有變矣然竊嘗讀安定之書考其所學
蓋不出乎章句誦說之間以近歲學者高明自得之
論校之其卑甚矣然以古準今則其虛實淳澆輕重
厚薄之效其不相逮至遠是以嘗竊疑之敢因垂問
之及而請質焉因風見教及此幸甚
影與飄同音
長組貌湖學時
薛知湖州
故論湖學
垂諭湖學本未不勝感歎而所論胡公之學蓋得於

古之所謂灑掃應對進退者尤為的當警發深矣竊
意高明所以成己成物之要未嘗不在於此而廣大
精微之蘊其所超然而獨得者又非言之所能諭也
跼伏之蹤未由承教於前徒切歎仰儻不棄外時得
惠音以鞭策之實為萬幸而來教之云倒置已甚讀
之愧汗踧踖不知所以自容萬望矜察自此書來存
訪死生之外削去虛文直以道義啓告誘掖此真區
區所望於門下者鄙懷慳慳亦得無所慚憚而悉布
之以求藥石之誨不審尊意能容而聽之否

答林謙之

光朝號文軒官至工部侍郎甫由人

茲承祇召還朝不獲為問以候行李伏奉黃亭所賜
教帖恭審執御在行神相起居萬福感慰之至比日
伏想已遂對揚從容啓沃必有以發明道學之要切
中當世之病者恨未得聞至於不次之除非常之數
則不足為執事道也喜慙不適時自量甚審所願不
過力田養親以求寡過而已所謂趨赴事功自當世賢
人君子事豈真所敢議哉抑熹久欲有請於門下而
未敢以進今輒因執事之問而一言之蓋熹聞之自
昔聖賢教人之法莫不使之以孝弟忠信莊敬持養
為下學之本而後博觀衆理近思密察因踐履之實

以致其知其發端啓要又皆簡易明白初若無難解者而及其至也則有學者終身思勉而不能至焉蓋非思慮揣度之難而躬行默契之不易故曰夫子之文章可得而聞也夫子之言性與天道不可得而聞也夫聖門之學所以從容積累涵養成就隨其淺深無非實學者其以此與今之學者則不然蓋未明一理而已傲然自處以上智生知之流視聖賢平日指示學者入德之門至親切處例以為鈍根小子之學無足留意其平居道說無非子貢所謂不可得而聞者往往務為險怪懸絕之言以相高甚者至於周行

却立瞬目揚眉內以自欺外以惑眾此風肆行日以益甚使聖賢至誠善誘之教反為荒幻險薄之資仁義充塞甚可懼也熹懸力薄材學無所至徒抱憂歎末如之何竊獨以為非如執事之賢素為後學所觀仰者不能有以正而祛之故敢以為請執事誠有意焉則熹雖不敏且將勉策駑頓以佐下風之萬一不識執事亦許之否乎謹此布聞因謝先辱餘惟為道自重以慰後學之望

黃亭在武夷近處

答江元適

孤陋晚生屏居深僻未嘗得親几杖之遊乃蒙不鄙

使賢子遺之手書致發明道要之文三編存問續緒
拜受跋語若無所容熹天資魯鈍自幼記問言語不
能及人以先君子之餘誨頗知有意於為己之學而
未得其處蓋出入於釋老者十餘年近歲以來獲親
有道始知所向之大方竟以才質不敏知識未離乎
章句之間雖時若有會於心然反而求之殊未有以
自信其所以奉親事長居室延交者蓋欲寡其過而
未能也日者誤蒙收召草野之臣其義不敢固辭造
朝之際無以待問輒以所聞於師友者一二陳之豈
宵中誠有是道以進之吾君哉特欲發其大端冀萬

一有助焉耳不謂流傳復誤長者之聽伏讀誨諭慚
負不知所言然厚意不可虛辱敢因所示文編其間
有不能無疑者略抒其愚以請於左右伏惟幸復垂
教焉

云云未得其處
恐當作要

別紙所喻汪洋博大不可涯涘然竊以平生所聞於
師友者驗之雖其大致規模不能有異至其所以語
夫進修節序之緩急先後者則或不同矣蓋熹之所
聞以為天下之物無一物不具夫理是以聖門之學
下學之序始於格物以致其知不離乎日用事物之
間別其是非審其可否由是精義入神以致其用其

間曲折纖悉各有次序而一以貫通無分段無時節
無方所以為精也而不離乎粗以為未也而不離
乎本必也優游潛玩屢飲而自得之然後為至固
不可自畫而緩亦不可以欲速而急譬如草木自萌
芽生長以至於枝葉華實不待其日至之時而擷焉
以助之長豈不無益而反害之哉凡此與來教所謂
傷時痛俗急於自反且欲會通其旨要以為駐足之
地者其本未指意似若不同故前後反復之言率多
違異今姑論其大槩以為求教之目其他曲折則非
得面承不能究也

不具夫理夫續集作天恐誤理下
續集有所謂寂然不動感而遂通

者學日無不在焉十七字一
以貫通以續集作理恐誤

熹嘗謂天命之性流行發用見於日用之間無一息
之不然無一物之不體其太端全體即所謂仁而於
其間事事物物莫不各有自然之分如方維上下定
位不易毫釐之間不可差繆即所謂義立入之道不
過二者而二者則初未嘗相離也是以學者求仁精
義亦未嘗不相為用其求仁也克去己私以復天理
初不外乎日用之間其精義也辨是非別可否亦不
離乎一念之際蓋無適而非天理人心體用之實未
可以差殊觀也孟子告齊王曰權然後知輕重度然

後知長短物皆然心為甚王請度之嗚呼此求仁之方也而精義之本在焉孟子其可謂知言之要矣今執事以反身自認存真合體者自名其學信有意於求仁矣而必以精義之云為語道之精體而無與乎學者之用力又以辨是非別可否為空言不充實用而有害乎簡易之理則熹恐其未得為至當之論也近世為精義之說莫詳於正蒙之書而吾峯胡先生者亦曰居敬所以精義也此言尤精切簡當深可玩味抑所謂反身自認存真合體者以孔子克己復禮孟子勿忘勿助之說驗之則亦未免失之急迫而反

與道為二大抵天人初無間隔而人以私意自為障礙故孔孟教人使之克盡己私即天理不期復而自復惟日用之間所以用力循循有序不凌不躐則至於日至之時廓然貫通天人之際不待認而合矣今於古人所以下學之序則以為近於傀儡而鄙厭之遂欲由徑而捷出以為簡易反謂孔孟未嘗有分明指訣殊不知認而後合握苗助長其不簡易而為傀儡亦已大矣熹竊以為日用之間無一事一物不是天真本體孔孟之言無一字一句不是分明指訣故孔子曰吾無隱乎爾又曰天何言哉而子貢曰夫子

之文章可得而聞也夫子之言性與天道不可得而聞也夫豈平日雅言常行之外而復有所謂分明指訣者哉

偶偏偶音詭恠異也偏者音磊木偶戲亦作魁禮

答詹體仁

儀之

湘中學者之病誠如來教然今時學者大抵亦多如此其言而不行者固失之又有一種只說踐履而不務窮理亦非小病欽夫往時蓋謂救此一種人故其說有太快處以啓流傳之弊今日正賴高明有以救之也爲學是分內事纔見高自標致便是不務實了更說甚底今日正當反躬下學讀書則以謹訓說爲

先脩身則以循規矩爲要除却許多懸空閑說庶幾平穩耳

答楊庭秀

萬里誠齋先生

程弟轉示所惠書教如奉談笑仰見放懷事外不以塵垢批糠累其曾次之超然者三復歎羨不能已已數日偶苦脾疾心腹撓悶意緒無聊值此便風不敢不附報自力在此僅能問何如他皆未暇及也時論紛紛未有底止契丈清德雅望朝野屬心切冀眠食之間以時自重更不以樂天知命之樂而忘與人同憂之憂毋過於優游毋決於道思則區區者猶有

望於斯世也

答李季章

壁巽巖巽
之子見宋史

兩書縷縷皆有飄然遠引之意不審果以何日決此計耶熹懇祠得請深荷上恩既還舊官無復可辭之誼孤危之跡雖未可保然姑無媿於吾心可也承問及先人紹興中文字遺藁中荀子第三篇疑即此奏今以納呈筆削之際儻得附見千萬幸甚諸公爭和議時先人與胡德輝范伯達諸公同入文字皆史院同寮也當時此一宗議論不知有無登載魏元履所集戊午讜議一書甚詳亦嘗見之否耶如館中未看

得行下建寧抄錄上送亦一事也

胡德輝胡理秘書
著作范伯達如圭

正字

熹罪戾之蹤竟不免更議然已晚矣又幸寬恩未即流竄杜門念答足以遺白不足為故人道也累年欲脩儀禮一書釐析章句而附以傳記近方了得十許篇似頗可觀其餘度亦歲前可了若得前此別無磨障即自此之後便可塊然兀坐以畢餘生不復有世間念矣元來典禮淆訛處古人都已說了只是其書衮作一片不成段落使人難看故人不曾看便為檢人舞文弄法迷國誤朝若梳洗得此書頭面出來令

人易看則此輩無所匿其姦矣於世亦非少助也勿
廣此說恐召坑焚之禍

熹今歲益衰精神筋力大非前日之比加以親舊凋
零如蔡季通呂子約皆死貶所令人痛心益無生意
決不能復支久矣留衛公得詩說日閱數版手加點
抹書來頗極稱賞仍盡能提其綱亦甚不易老年精
力乃能及此又不厭章句訓詁之煩也要是天姿深
靜純實故能若此亦恨其聞此之晚不得早效區區
之愚耳德脩文叔家居亦何所務各有一書煩為致
之子直亦然也今年閩中鄭黃鄧皆物故氣象極覺

蕭索楊子直得祠又遭駁項平父聞亦杜門不敢見
入其它吾人往往藏頭縮頸不敢吐氣甚可笑也

公正德脩劉光祖文叔黃度
子直楊芳項平父各安世

熹伏承不鄙貺以先正文簡公詩編行實并及三夫
人二壙刻文跪頌伏讀足慰平生高山仰止之心而
反復再三又見其立德立言明白磊落所以開發蒙
吝有不一而足者幸甚幸甚至於不察熹之愚陋而
將使之纂次其事刻之幽宮以視來世則熹之不德
不文人知其不足以勝此寄矣顧念平生未嘗得拜
文簡公之函丈而讀其書仰其人則為日蓋已久又

嘗聽於下風而知公之所以相知亦有不待識其面
且而得其心者是以願自附焉而不敢辭也唯是今
者方以罪戾書名偽藉平居杜門屏氣齟齬不敢輒
出一語以干時禁而慮慮度日猶懼不免乃於此時
忽爾破戒政使不自愛惜亦豈不為公家之累是以
彷徨顧慮欲作復止而卒未有以副來命之勤也伏
惟執事姑少察此而深計之竊意高文大筆取之今
世不為無人固不必眷眷於一無狀罪廢之人而使
盛德百世之傳不得以時定也
文簡公李燾字仁父
壁父齟音窄齧也虞
通作
懷

答范文叔
偽學籍有范仲一
黼即文叔也

讀書不覺有疑此無足怪蓋往年經無定說諸先生
所發或不同故讀書不能止疑比年以來衆說盡出
講者亦多自是無所致疑但要反復玩味認得聖賢
本意道義實體不外此心便自有受用處耳尹和靖
門人贊其師曰不哉聖謨六經之編耳順心得如誦
已言要當至此地位始是讀書人耳

春風堂記久已奉諾安敢忘之但近覺孤危之迹為
當世所憤疾日以益甚遂絕口不敢為人出一語非
獨畏禍亦義理之當然也兼亦覺得此等空言無益

於實僅同戲劇區區裝點是亦徒爲玩物喪志而已
若論爲己切實功夫豈此等所能助而爲仁由已亦
何待他人之助耶况明道先生氣象如此乃是不違
仁之影子今於影外旁觀而玩其形似孰若深察其
心之所到而身詣之之爲實耶竊謂爲仁之要固不
出乎聖賢之言若子夏所謂博學篤志切問近思夫
子所謂克己復禮所謂恭敬忠恕可以備見其用力
之始終矣幸深味乎此而實加功焉則爲有以慰區
區之望固不在於言語文字之間而已也

答陳君舉

傅良止齋先生未嘉人

熹自頃寓書之後南來擾擾未能嗣音至於懷仰德
義則無日而不勤也乃蒙不忘專人在教誨示之勤
尤荷不鄙然嘗謂人之爲學若從平實地上循序加
功則其目前雖未見日計之益而積累功夫漸見端
緒自然不假用意裝點不待用力支撐而聖賢之心
義理之實必皆有以見其確然而不可易者至於講
論之際心即是口口即是心豈容別生計較依違遷
就以爲諧俗自便之計耶今人爲學既已過高而傷
巧是以其說常至於依違遷就而無所分別蓋其胸
中未能無纖芥之疑有以致然非獨以避咎之故而

後詭於詞也。若熹之愚，自信已篤，向來之辯，雖至於遭
讒取辱，然至于今日，此心耿耿，猶恨其言之未盡，不足
以暢彼此之懷，合異同之趣，而不敢以為悔也。不識
高明何以教之，惟盡言無隱，使得反復其說，千萬辛
甚。老病幽憂，死亡無日，念此一大事，非一人私說，一
朝淺計，而終無面寫之期，是以冒致愚悞，鄉風引領，
不勝馳情。

與劉德修光祖慶元六年諫大夫張釜劾光

祖撰涪州學記云云謫房州時光

忽閱邸報有房陵之行爲之悵然寢食俱廢累日不

能自釋，不審彼以何日就道，自簡至房，道里幾何，取
道何州，閱幾日，而後至，風土氣候不至甚異否，居處
飲食能便安否，官吏士民頗知相尊敬否，吾道之窮
一至於此，然亦久知會有此事，但不謂在目前耳。馮
李亦復不容，李章得郡而名見，乃第疏中，恐亦非久
安者。李良仲、馮飛冥，冥使人深羨，第恨不得扣其玄
中之趣，范文叔却幸未見物色，想亦深自晦也。熹足
弱氣痞已半年矣，策杖人扶，僅能略移跬步，而腹脇
脹滿不能俯案，觀書作字一切皆廢，衰憊至此，無復
久存之理，承教無期，尚冀以時深爲世道自愛耳。李良

仲語類有李杲字良仲未知是此人否得扣其玄中之趣按語類李良仲紹熙甲寅已見先生於靈芝矣今此書則在先生納祿之後而云云似有未識之恨疑別有一良仲也

答黃文叔

度浦江人隆興癸未進士度將論佐胃佐胃以御筆除度知平江府

歸度辭

去歲趨召北歸道聞新夫子以執事為賢擢居言路方與善類同深喜幸以為必將有以開寤上心謹始建極以慰中外之望而未一二日已聞出守之命則又為之惘然昏惑莫曉所謂而又決知吾道之將不行矣曾未兩月果已罷遣還家又苦疾病乃於呻吟之中忽奉手教之辱三復醒然過望幸甚然而執禮

過謙稱道浮實比擬非倫則非淺陋之所敢當也豈其戲耶則執事莊士也非以言為戲者也以為誠耶則懼其有傷執事者閔理之明知人之指也至論古昔聖賢所處之難易則執事之意可知矣如喜之愚蓋嘗不自揆度而妄竊有志於此然學未聞道言語無力精神不專不足以動人悟物蓋昔人所謂說將尚不下者而又何足以議此耶雖然今亦老矣衰病益侵且暮且死此心雖不敢忘亦無復有望於將來矣顧今運祚方隆聖德日新有求之圖必將與明者處之則夫所謂致一以格天者乃執事事也執事其

亦察乎舜之所謂人心道心者為如何擇之必精而不使其有人心之雜守之必固而無失乎道心之純則始終惟一而伊尹之所以格天者在我矣於以正君定國而大庇斯人於無窮豈不偉哉鄙見如此不識執事以為如何如有未當願及復之以卒承教之願千萬幸也

趨召先生極論獨斷使優戲以問之御筆除官觀歸說將尚不下後漢第五倫傳蓋延為馮翊太守多不法倫數切諫延恨之故滯不得舉後倫每讀詔書歎曰此聖主也一見決矣等輩笑曰爾說將尚不下安能動萬乘乎將州將也指蓋延也

答徐元敏

伏觀尊誨之微指大率以曲禮首章為備已治入之

大要喜其易行而病於難久此非擇善之精及躬之切何以及此顧念平昔所聞於師友者其大端誠不外是然行之不力一暴十寒其樂舒肆喜談謔之病殆有甚於高明之所患者而何能有以少補於萬分抑又聞之主敬者存心之要而致知者進學之功二者交相發焉則知日益明守日益固而舊習之非自將日改月化於冥冥之中矣

答林正夫

慕仰高風固非一日今茲楊通老來忽奉手誨之辱執禮過恭尤使人恐懼踧踖而無所避也雖然高明

之所以見屬之意豈若世之指天拔身口而相要
於聲利之場者哉況在今日而言之尤足以見
誠之至而好之篤是以不敢隱其固陋而願自
附於下風焉蓋嘗聞之先生君子觀浮圖者仰
首注視而高談不若俯首歷階而漸進蓋觀於
外者雖足以識其崇高鉅麗之爲美孰若入於其
中者能使真爲我有而又可以深察其層累結
架之所由哉自今而言聖賢之言具在方無其
所以幸教天下後世者固已不遺餘力而近世
一二先覺又爲之指其門戶表其梯級而先後

之學者由是而之焉宜亦甚易而無難矣而有
志焉者或不能以有所至病在一觀其外粗覘彷彿
而便謂吾已見之遂無復入於其中以爲真
有而力究之計此所以驟而語之雖知可悅而
無以深得其味遂至半途而廢而卒不能以有
成耳竊計高明所學之深所守之正其所蘊蓄
蓋已施之朝廷而見於議論之實於此宜不待於
愚言矣然旣蒙下問不可以虛辱而熹之所存
不過如此若不以告於門下以聽執事者之采擇
則又有非區區之所敢安者是以敢悉布之

可否之決更俟來教熹所虛佇而仰承也。通老在此相聚甚樂比舊頓進知有切磋之益惜其相去之遠忽起歸興而不可留也。德修崎嶇遠謫令人慙心然聞其平居對客誦言固每以此自必乃今為得所願然所關繫則不淺矣有寫其記文以來者已屬通老呈自想亦深為廢卷太息也。揚通老

答戴適

熹來此得足下於衆人之中望其容色接其議論而知足下之所存若有所蓄積而未得其所以發之者心獨期足下可共進於此道及以論語之說授諸生

諸生方愕眙不知所向而足下獨以為可信也。手抄口誦而心惟之熹謂足下將得其所以發之者矣甚慰所望今辱書及以所抄四大編示之而責其淺陋之辭託各經端則非熹之任而足下之過也。夫執經南面而以其說與門人弟子相授受此其非熹之任明矣熹無所復道獨敢竊議足下之所以過願寬其僭易而幸聽之。夫學期以自得之而已人知之不知之無所與於我也。今足下自謂其已自得之耶則宜無汲汲於此而熹之言亦何為足下重不然雖熹妄言之於足下何有足下之為甚過足下勉自求之期

有以自得之而後已熹雖荒落矣尚能與足下上下其說而講評之四編且以歸書室而具其所以然者報足下幸察切驚貌

答林齋

辱示書及所為文三篇若以是質於熹者熹少不喜辭長復嬾廢亡以副足下意然嘗聞之學之道非汲汲乎辭也必其心有以自得之則其見乎辭者非得已也是以古之立言者其辭粹然不期以異於世俗而後之讀之者知其卓然非世俗之士也今足下之詞富矣其主意立說高矣然類多採摭先儒數家之

說以就之耳足下之所以自得者何如哉夫子所謂德之棄者蓋傷此也足下改之甚善示喻推所聞以講學間里間亦甚善記曰教然後知困知困則知所以自彊矣熹所望於足下者在此足下勉旃

答呂侗

惠書甚慰所守審如是足下之所存誠遠且大非熹所能及也顧不能不以貧自累而求有以得於人則足下之忍其大而不可忍其細又非熹之所能知也抑熹之官於此祿不足以仁其家而無以副足下之意敢以所聞為謝莫足下之堅其守也貧者士之常惟

無易其操則甚善

答楊宋卿

熹聞詩者志之所之在心爲志發言爲詩然則詩者豈復有工拙哉亦視其志之所向者高下如何耳是以古之君子德足以求其志必出於高明純一之地其於詩固不學而能之至於格律之精粗用韻屬對比事遣辭之善否今以魏晉以前諸賢之作考之蓋未有用意於其間者而況於古詩之流乎近世作者乃始留情於此故詩有工拙之論而葩藻之詞騰言志之功隱矣熹不能詩而聞其說如此無以報足下

意姑道一二盛編再并封納并以爲謝

答柯國材

熹奉親粗遣武學闕尚有三年勢不能待目今貧病之迫已甚旦夕當宛轉請祠也親年日老生事益聊落雖吾道固如此然人子之心不能不慨然耳時事竟爲和戎所誤今歲虜人深入據有淮南留屯不去監前事之失不及汲於渡江欲圖萬全之舉此可爲寒心而我之所以待敵者內外本未一切初弊又甚於往年妄論之時矣奈何奈何遠書不能詳言也熹自延平逝去學問無分寸之進汨汨度日無朋友之

助未知終何所歸宿邇來雖病軀粗健然心力凋弱
目前之事十忘八九至於觀書全不復記以此兀兀
於致知格物之地全無所發明思見吾國材精篤之
論而不可得臨書恍然也不合無愧之說在我固然
第所不能無恨者精神言語不足以感悟萬一為恨
耳若人人持不合無愧之說則君臣之大倫廢矣如
何如何春秋工夫未及下手而先生棄去蓋亦以心
志凋殘不堪記憶此書雖云本根天理然實與人事
貫通若不稽考事迹參以諸儒之說亦未易明也故
未及請其說然嘗略聞其一二以為春秋一事各是

發明一例如看風水移步換形但以今人之心求聖
人之意未到聖人洒然處不能無失耳此亦可見先
生發明之太旨也

武學關孝宗隆興元年
除武學博士先生延平

石丈相聚所談何事其篤誠好學已不易得而議論
明快想講論之際少所疑滯也書來有少及復草草
作答不能盡所言大抵講學只要理會義理非人所
能為乃天理也天理自然各有定體以為深遠而抑
之使近者非也以為淺近而擊之使深者亦非也學
者患在不明此理而取決於心夫心何常之有好高
者已過高矣而猶患其卑滯於近者已太近矣而猶

病其遠此道之所以不明不行而學者所以各自爲
方而不能相通也前此以陳許二友好爲高奇喜立
新說往往過於義理之中正故常因書箴之蓋因其
病而藥之非以爲凡講學者皆當畫於淺近而遂止
也然觀聖賢之學與近世諸先生長者之論則所謂
高遠者亦不在乎創意立說之間伊川云吾年二十
時解釋經義與今無異然思今日意味覺得與少時
自別又尹和靖門人稱尹公於經書不爲講解而耳
順心得如誦已言此豈必以創意立說爲高哉今吾
輩望此地位甚遠大槩讀書且因先儒之說通其文

義而玩味之使之浹洽於心自見意味可也如舊說
不通而偶自見得別有意思則亦不妨但必欲於傳
注之外別求所謂自得者而務立新說則於先儒之
說或未能究而遽舍之矣如此則用心愈勞而去道
愈遠恐駸駸然失天理之正而陷於人欲之私非學
問之本意也且謂之自得則是自然而得豈可強求
也哉今人多是認作獨自之自故不安於他人之說
而必已出耳凡此皆石文書中未及盡佈者或因講
論之次閑爲及之幸甚幸甚并以呈齊仲順之不知
如此卑說還可高意否二公更不及別書也

石文子
重陳齊

仲許
順之

答許順之

熹衰老幸向安然氣體虛弱非復昔時心力亦未復
都不敢思慮舊業荒廢無所發明反而求之似於存
養用力處未有地位甚以自懼耳如吾友於此却已
有餘第未能達於詞命之間恐其間亦有未徹底處
却宜於事物名數上著少工夫蓋既無精粗本末之
異即此亦不可忽也

前書因見讀禮故勸以致詳微細因有損所有餘勉
所不足之言來書乃謂本末精粗本無二致何用如

此分別此又誤矣若每每如此則更無用功處更無
開口處矣子夏對子游之語以為譬之草木區以別
矣何嘗如此儻侗來惟密察於區別之中見其本無
二致者然後上達之事可在其中矣如吾子之說是
先向上達處坐却聖人之意正不如是雖至於堯舜
孔子之聖其自處常只在下學處也上達處不可著
工夫更無依泊處日用動靜語默無非下學聖人豈
曾離此來今動不動便先說箇本末精粗無二致正
是鶻菴素向來李丈說鐵籠罩却之病恐未免也
承在縣庠為諸生講說甚善甚善但所寄諸說求之

皆似太過若一向如此恐駸駸然遂失正途入於異
端之說為害亦不細差之豪釐謬以千里况此非特
豪釐之差乎恐當且以二先生及范尹二公之說為
標準反復玩味只於平易懇實之處認取至當之理
凡前日所從事一副當高奇新妙之說並且倚閣久
之見實理自然都使不著矣蓋為從前相聚時熹亦
自有此病所以相漸染成此習尚今日乃成相誤惟
以自咎耳如子韶之說直截不是正理說得儘高儘
妙處病痛愈深此可以為戒而不可學也何由面詰
究此精微臨風鬱結無有窮已國材元聘為究如何

昨寄得疑難來又是一般說話大抵齊仲頌之失之
太幽深而二公失之太執著

執著者有時而通幽深者蕩而不反

中間一條平坦官路却沒人行著只管上山下水是
甚意思因書可錄此意及二序送之為致不及書之
意范伯崇學大進劉德明者亦稍識理趣皆可喜耳
伯崇雜說一紙附去可見其持守不差見理漸明之
大槩矣然其說有少未盡更求之却以見喻伯崇去
年春間得書問論語數段其說甚高妙因以呈李先生
李先生以為不然令其懇實做工夫後來便別此
亦是一格也然其當時高妙之說亦只是依諸先生

說而推言之適當處耳非如頌之所示硬將文義拗
橫說却也切宜速改至祝至祝大抵文義先備盡之
蓋古今人情不相遠文字言語只是如此但有所自
得之人看得這意味不同耳其說非能頓異於衆也
不可只管立說求奇恐失正理却與流俗詭異之學
無以異也只據他文理反復玩味久之自明且是胸
中開泰無許多勞攘此一事已快活了試依此加功
如何子韶張九成云
讀書大抵只就事上理會看他語意如何不必過為
深昧之說却失聖賢本意自家用心亦不得其正

於支離恠僻之域所害不細矣切宜戒之只就平易
懇實處理會也必有事焉之書不曾接得不知如何
上蔡云出入起居無非事者正以待之則先事而迎
忘則涉乎去念助長則近於留情聖人之心如鏡所
以異於衆人也觀此所謂事者只是事事之事遇此
一事則事此一事本體昭然此便見所謂操則存舍
則亡也見此理極平易只在目前人自貪慕高遠所
以求之過當而自失之也上蔡說延平答問以為明
道答上蔡語此直以為上
蔡語恐當以
答問為是
石丈惠書以夫子見譚謹此二字古人用之本非尊

稱如伐顓臾之季氏毀仲尼之叔孫皆得以稱蓋猶
曰夫夫之人之比耳然以孔門弟子稱仲尼以此故
後之人往往避其號蓋不惟不敢使人以是加諸已
亦不敢以是加諸人也熹初通書不欲紛紜及此幸
為一言繼此惠音削去二字乃所願望不然不敢拜
而受也告為深陳之至懇至懇且既以道相知凡百
禮文之過其宜者恐亦有可刊落者得并及之幸甚
幸甚

此間窮陋夏秋間伯崇來相聚得數十日講論稍有
所契自其去此間幾絕講矣幸秋來老人粗健心間

無事得二意體驗比之舊日漸覺明快方有下工夫
處日前真是一自引衆首耳其說在石丈書中更不
縷縷試取觀之為如何却一語也更有二絕云半畝
方塘一鑑開天光雲影共徘徊問渠那得清如許為
有源頭活水來試舉似石丈如何

書中所論皆的當之論所恨無餘味耳更向平易著
實處子細玩索須於無味中得味乃知有餘味之味
耳敬齋記所論極切當近方表裏看得無疑此理要
人識得識得即雖百千萬億不為多無聲無臭不為
少若如所疑即三綱五常都無頓處九經三史皆為

刺語矣此正是順之從來一箇窠臼何故至今出脫
不得豈自以為是之過耶聞有敬字不活之論莫是
順之敬得來不活否却不干敬字事惟敬故活不敬
便不活矣此事所差豪釐便有千里之繆非書札所
能盡切在細思會當有契耳

今歲却得擇之在此大有所益始知前後多是悠悠
度日自茲策勵不敢不虔但道力衰薄未知能終不
退轉否耳大學之說近自多所更定舊說極陋處不
少大抵本領不是只管妄作自悞悞人深為可懼耳
熹一出幾半年學問思辨之益警發為多大抵聖門

求仁格物之學無一事與釋氏同所以尋常議論間
偶因記憶自然及之非是特然立意與之爭勝負較
曲直也想見孟子之闢楊墨亦是如此故其言曰予
豈好辯哉予不得已也今觀所與祝弟書乃有謗釋
氏之語殊使人驚歎不知吾友別後所見如何而為
是語也及細讀二書則所可恠者不特此耳且論其
大者如所謂棲心淡泊與世少求玩聖賢之言可以
資吾神養吾真者一一勘過只此二十餘字無一字
不有病痛夫人心是活物當動而動當靜而靜動靜
不矣其時則其道光明矣是乃本心全體大用如何須

要務之淡泊然後為得且此心是箇什麼又如何其
可棲也耶聖賢之言無精粗巨細無非本心天理之
妙若真看得破便成已成物更無二致內外本末一
以貫之豈獨為貧吾紳養吾真者而設哉吾友若信
得及且做年歲工夫屏除舊習案上只看六經語孟
及程氏文字著開擴心胸向一切事物上理會第一
喚作塵事方知體用一源顯微無間是真實語不但
心也做兩句好言語說而已也又承見此則甚荷相愛
之深然儒者之學於此亦只是順理而已當顯則顯
當默則默若涵養深淳則發必中節更無差互既未

到此地位自是隨其氣習所發不同然若一向矯枉
過直則柔弱者必致在暴剛彊者必為退縮都不見
天理之當然惟聖門之學以求仁格物為先所以幾
處自然見得是非可否不差毫髮其工夫到與不到
却在人今吾友見教要便天下之人不知有自家方
做得事且道此一念從何處來喚做本心得否喚做
天理得否直是私意上又起私意縱使磨挫掩藏得
全不發露似箇沒氣底死人亦只是計較利害之私
與聖門求仁格物順理涵養氣象大故懸隔信知儒
釋只此豪釐間便是繆以千里處却望吾友更深思

之仍將此書遍呈諸同志相與反復商確不可又似
向來說先覺之義更不與徐柯二丈見也朋友商論
正要得失分明彼此有益何必於此揜覆只此是私
意根株若不拔去使之廓然大公何緣見得義理真
實處耶所論好善優於天下只是一箇公字此等處
何不公之甚也只看六經語孟及程氏文字著者與看字疑當互換
尤溪書來議論極佳不知平日講論於此等處有異
同否若無異向則亦可疑耳擇之所見且精工夫且
密甚覺可畏如熹輩今只是見得一大綱如此不至
墮落邪魔外道耳若子細工夫則豈敢望深也徐柯

朱子書後

卷之四

二丈及汝器近思諸友相聚說何等話聞已契肉甚
擴充則異說不能感矣亦
溪石子重時爲尤溪名聲
學者正當於旦晝之所爲處理會克己復禮懲忿窒
慾今此氣常清則仁義之心常存非是必待夜間萬
慮澄寂然後用功也若必如此則日間幹當甚事也
孟子此四句只是說人心是箇活物湏是操守不異
放舍亦不須如此安排也心一也操而存則義理明
而謂之道心舍而亡則物欲肆而謂之人心亡不是
無只是
去出逐自入心而收回便是道心自道心而放出便
是人心頃刻之間恍惚萬狀所謂出入無時莫知其

朱子書後

卷之四

鄉也所引仁字尤不是正是倒說了且更平心玩味
不要說得太高妙無形影非唯教他人理會不得自
家亦理會不得也大率講學本為聖賢之言難明故
就下面說出教分明若是向上面說將去即轉見理
會不得矣如建州人未識泉州道且教他從南劍州
問路去豈可教他過漳州尋耶此是大病不可不知
春來弔喪問疾略無少暇前月未間元履又不起疾
交遊凋落可為傷嘆而歲月如流悔吝日積亦將無
聞而死為可懼耳

尤川學政甚肅一方向風極可喜擇之書來云古田

宰聞之亦欲效顰果爾則石宰之化不止行於尤川
矣天下事無不可為但在人自彊如何耳觀此可見
也順之既有室家不免略營生理書中所說不知當
如何措畫此固不得不爾也粗有衣食之資便於俯
仰於人敗人意思此亦養氣之一助也但不可及沒
皇皇役心規利耳想順之於此必有處決不至如此
也

尤川節尤溪子重為尤溪一
命擇之掌教學學者甚盛

閩中安好想亦能其淡泊相助經家務也修身齊家
只此是學更欲別於何處留心耶相見似無可說別
後又覺得有無限說話商量以此臨風深懷想耳

所示數條鄙意有未安者已具紙尾大抵舊來多以佛老之似亂孔孟之真故每有過高之弊近年方覺其非而亦未能盡革但時有所覺漸趨平穩耳順之此病尤深當痛省察矯揉也鄧尉持已愛人如此甚不易得但今時學者輕率大言先將恭敬退讓之心壞了不是小病若實有爲己之意先去此病然後可耳

答陳齊仲

相馬之說恐與忠恕之意不同蓋忠恕之理則一而人之所見有淺深耳豈有所揀擇取舍於其間哉學

者欲知忠恕一貫之指恐亦當自遠處著力方始隱約得一箇氣象豈可判然以爲二物而不相管耶格物之論伊川意雖謂眼前無非是物然其格之也亦須有緩急先後之序豈遽以爲存心於一草木器用之間而忽然懸悟也試且如今爲此學而不窮天理明人倫講聖言通世故乃兀然存心於一草木一器用之間此是何學問如此而望有所得是炊沙而欲其成飯也來諭似未看破此處病敗恐不免出入依違之弊耳

隱約依倚
勢歸之意

答王近思

力行

窮居且爾憂苦之餘無復仕進意杜門修身以畢此生而已累書所問緣多出入無人收拾往往散落以此不及奉報然其大略只是要做文字應科舉誇世俗而已年來懶廢於此尤悉棄置不能有所可於其間也

示論學之難易及別紙所疑足見好問之意本欲一答去然熟觀之似未嘗致思而汎然發問者若此又率然奉答竊恐祇爲口耳之資而無益問學之實今且請吾友只將所問數條自加研究自設疑難以吾心之安否驗衆理之是非縱未全通亦須可見大

略然後復以見論計其間當有不待問而決者矣前此欲銘先夫人之墓以未嘗習爲之無以應命亦自念君子之事親以誠正不在此但能篤志力行使入謂之君子之子則其爲親榮也大矣祭文尤所采解凡喪父在父爲主今自主之一失也古者將葬祖奠遣奠祝以事告而無文辭二失也古人居喪則言不文蓋哀戚勝之不能文也今文甚矣又將振而矜之此三失也孔子曰喪與其易也寧戚吾友其未之思歟本抵吾友誠懇之心似有未至而華漢之飾常過其哀故所爲文亦皆辭勝理文勝質有輕揚詭異

之態而無沈潛溫厚之風不可不深自警懲自詆訶敏
行以改故習之謬也

平時無事是非之辨似不能惑事至而應則陷於
非者十七八雖隨即追悔後來之失又只如故今
欲臨事時所謂可喜可懼可畏可沮者不能移其
平時之心其道何由

此是本心陷溺之久義理浸灌未透之病且宜讀書
窮理常不間斷則物欲之心自不能勝而本心之義
理安且固矣

答魏元履 按之號
良齋

欲為春秋學甚善但前輩以為此乃學者最後一段
事蓋自非理明義精則止是較得失考同異心緒轉
雜與讀史傳披故實無以異况如老兄心中本鬧恐
非所以益失而趨中也愚意以為不若只看論語用
年歲工夫却看證候淺深別作道理然但論語中看
得有味餘經亦迎刃而解矣聖人之言平易中有精
深處不可穿鑿求速成又不可苟且閑看過直須是
置心平淡懇實之地玩味探索而虛恬省事以養之
遲久不懈當自覺其益切不可以輕易急迫之心求
旦暮之功又不可因循媮惰虛度光陰也語錄中工

兩段說此事處別紙上呈可見此非臆說亦見春秋
之未易學也若於此見得一義理血脉方覺從前一
團私意妄想自家身心尚且奈何不下如何說得行
道救時底話真是可笑

裘父所云欲於論語作數說此語可疑尋常讀書只
為胸中偶有所見不能默契故不得已而形之於口
恐其遺忘故不得已而筆之於書初不覺其成說也
若讀書而先有立說之心則此一念已外馳矣若何
而有味耶老兄所論昭烈知有權而不知有正愚意
則以謂先主見幾不明經權俱失當劉琮迎降之際

不能取荊州烏在其知權耶至於狼狽失據乃不得
已而出於盜竊之計善用權者正不如此若聲罪致
討以義取之乃是用權之善蓋權不離正正自有權
二者初非二物也子房用智之過有微近譎處其小
者如躡足之類其大則挾漢以為韓而終身不以語
入也若武侯即各義俱正無所隱匿其為漢復讎之
志如青夫白日人人得而知之有補於天下後世非
子房比也蓋為武侯之所為則難而子房投間乘隙
得為即為故其就之為易耳頃見李先生亦言孔明
不若子房之從容而子房不若武侯之正大也

比來觀何書大抵人當有以自樂則用行捨藏之間
隨所遇以安之和靜先生云如雲則行如潦則休此
言有味也三哥失解能自遣否後生所慮學不足身
不立爾得失區區何足深介意也

與魏應仲元履子

三哥年長宜自知力學以副新庭責望之意不可自
比兒曹虛度時日逐日早起依本點禮記左傳各二
百字參以釋文正其音讀儼然端坐各誦百遍訖誦
孟子三二十遍熟復玩味訖看史數板反復數遍大
抵所讀經史切要反復精詳方能漸見旨趣誦之宜

舒緩不迫令字字分明更須端莊正坐如對耶殿則
心定而義理易究不可貪多務廣涉獵鹵莽纔看過
了便謂已通小有疑慮即更思索思索不通即置小
冊子逐日抄記以時省閱俟歸日逐一理會切不可
含糊護短恥於資問而終身受此黯暗以自欺也又
置簿記逐日所誦說起止以俟歸日稽考起居坐立
務要端莊不可傾倚恣至昏怠出入步趨務要凝重
不可票輕以害德性以謙遜自牧以和敬待人凡事
切須謹飭無故不須出入少說閑話恐廢光陰勿觀
雜書恐分精力早晚須自點檢所習之業每旬休日

將一旬內書溫習數過勿令心少有放佚則自然漸近道理講習易明矣

答范伯崇 矣未各念德先生姬皆

熹嘗問先生替叟殺人事先生曰蒯贖父子只為無此心所以為法律所縛都轉動不得若舜之心則法律縛他不住終身訢然樂而忘天下求仁得仁何怨之有然此亦只是論其心爾豈容他如此去得問先儒八議之說如何曰此乃蔽罪時事其初須著執之不執則士師失其職矣熹嘗以先生之意參諸明道及文定之說竊謂蒯贖父子之事其進退可否只看

輒之心如何爾若輒有拒父之心則固無可論若有避父之心則衛之臣子以君臣之義當拒蒯贖而輔之若其必辭則請命而更立君可矣設或輒賢而國人不聽其去則為輒者又當權輕重而處之使君臣父子之間道並行而不相悖亦必有道苟不能然則逃之而已矣義至於此已極精微但不可有毫髮私意於其間耳來喻以謂蒯贖之來諸大夫當身任其責請命于天子而以逆命討之是矣但又云輒不與謀其事避位而聽於天子則恐不免有假手於大夫以拒父而陰幸天子之與已之心焉掩耳盜鐘為罪

愈大

許多私意都在只是免得自家犯手情理充不好也

又云遽然興師以督

其父於人子之心安乎自衛國言多則興師以拒得

罪於先君而不當立之世子義也自輒言之則雖已

不與謀而聽大夫之所為請命於天子而討之亦何

心哉來喻本欲臣子之義兩得立意甚善但推而言

之便有此病似是於輒之處心緊要處看得未甚灑

落所以如此故愚竊謂輒之心但當只見父子之親

為大而不可一日立乎其位自始至終自表至裏只

是一箇逃而去之便無一事都不見其他方是直截

不審伯崇以為如何

先生近平八議親故功賢能勤貴實

孟子論取之而燕民不悅則勿取文王是也取之而

燕民悅則取之武王是也此亦止為齊王欲取燕故

引之於文武之道非謂文王欲取商以商人不悅而

止而武王見商人之悅而歸已而遂往取之也如言

仲尼不有天下益伊尹周公不有天下豈益周公伊

尹仲尼皆有天下之願而以無天子薦之與天意

未有所廢而不得乎直是論其理如此耳凡此類皆

須研究體味見得聖人之心脫落自在無私毫惹絆

處方見義理之精微於日用中自然得力所謂知至

而意誠也蓋幾微之間衆理昭晰雖欲自欺而不可

得矣至此方可說言外見意得意忘言不然止是鑽

故紙耳

私毫私恐
當作絲

在喪廢祭古禮可攷者如此但古人居喪衰麻之衣
不釋於身哭泣之聲不絕於口其出入居處言語飲
食皆與平日絕異故宗廟之祭雖廢而幽明之間兩
無憾焉今人居喪與古人異卒哭之後遂墨其衰凡
出入居處言語飲食與平日之所為皆不廢也而獨
廢此一舉恐亦有所未安竊謂欲處此義者但當自
省所以居喪之禮果能始卒一一合於古禮即廢祭
無可疑若他時不免墨衰出入或其他有所未合者

尚多即卒哭之前不得已準禮且廢卒哭之後可以
略放左傳杜注之說遇四時祭日以衰服特祀於几
筵用墨衰常祀於家廟可也但卒哭之期須既葬立
主三虞之後上日而祭以成事方可耳若神柩在而
欲以百日為斷墨衰出入則決然不可愚見如此不
知伯崇以為如何

須送行語哀苦中不復能為文然觀伯諫之言已是
藥石但更須求所以立其本耳日用之間以莊敬為
主凡事自立章程鞭約近裏勿令心志流漫其剛之
大本乎由此益加窮理之功以聖賢之言為必可信

以古人之事為必可行則世俗小小利害不能為吾
累矣當官廉謹是吾輩本分事不得多說然微細處
亦須照管不可忽略因循怠墮呂氏童蒙訓下卷數
條防閑之道甚至皆可佩服自治既不苟更能事上
以禮接物以誠臨民以寬御吏以法而簿書期會之
間亦無所不用其敬焉則庶乎其少過矣暇日勿廢
溫習少飲酒擇交遊子澄相去不遠真直諒多聞之
益果能受其實攻而不憚改焉則彼亦將不憚啓告
之煩矣

熹比携二子過寒泉招季通來相聚更有一二朋友

隋唐本
作情

來相聚初不廢講議但昏惰不敏自救不給何能有
以及入而學者氣稟彊弱不齊各有病痛未見卓然
可恃者此亦殊可懼也知老兄官守不苟又得賢守
相聽從得以少伸已志深副所望向來猶恐應變之
才有所不周今乃如此信乎氣質之用小道學之力
大而程子所謂一命之士苟存心愛物於人必有所
濟者非虛語也凡百勉旃以大遠業之基增吾黨之
氣幸甚氣質之用小道學之力大
此十字陳忠肅責沈文語
欽夫得行所學吾道之幸但此事大難不可喜而可
懼近復如何得正月書亦未有異聞也論學依舊有

好高傷快之弊熹近覺此事全放在底下著實涵養
玩味方見工夫

欽夫日前議論傷快無涵養本原功夫終是覺得應
事匆匆熹亦近方覺此病不是小事也伯恭講論甚
好但每事要鶻圖說作一塊又生怕人說異端俗學
之非護蘇氏尤力以為爭校是非不如斂藏持養頃
見子澄有此論已作書力辨之不知竟以為如何也
伯崇近白何以用功官事擾擾想不得一向靜坐看
書然暇時速須收斂身心或正容端坐或思泳義理
事物之來隨事省察務令動靜有節作止有常毋使

放逸則內外本末交相浸灌而大本可立衆理易明
矣此外別無著力處官事有可以及人處想不憚出
力然檢身馭下尤不可不加意也

異端害正固君子所當闢然須是吾學既明洞見大
本達道之全體然後據天理以開有我之私因彼非
以察吾道之正議論之間彼此交盡而內外之道一
以貫之如孟子論養氣而及告子義外之非因夷子
而發天理一本之大此豈徒攻彼之失而已哉所以
推明吾學之極致本原亦可謂無餘蘊矣如此然後
能距楊墨而列於聖賢之徒不然譎譎相訾以客氣

爭勝負是未免於前輩自敝之譏也

朱子書節要卷之七

問所

[Faded vertical text columns, likely bleed-through from the reverse side of the page]

